

# Konflager 2007

Autor: Adrian Hügi

**Fritig:** Am 8.20 hei mer üs aui am Bahnhof Ins besammelt. Obwou es pari e chli spät cho si, hei mer aui dr Zug fürwütscht. Mir si aui sehr froh gsi, dass dr Herr Gatschet aui üssi schwäre Täsche bis uf Bevaix ufe gfare het. **Merci fiu fiu mau!** Dr erscht haut hei mer ds Neuchatel gmacht. Nachme chline spaziergang durchs Städtli hei mer e haut bi re Chiuche gmacht. Dr Chiuche vom Pastor Forel. Mir hei es ufgabe Blatt becho und d lösige hei mer aui ir Chiuche müesse ga sueche. Nach öpe re haub Stund si mer witer ids innere vor Stadt. Dört hei mer d Ufgabe becho di origineuschte Postkarte ds finge und e Tourischt ds finge wo vom witschte här chunt. Nachdem mir Pick-nickt hei si mer wider ufe Zug bis nach Bevaix. Vo dört si mer i 30 min. äschträngends Bärguf loufe bi üsere Herberge a cho. D Herbergä isch chli abgläge i mä Waud-Drüeck. Vorem Huus hets zwöi Goal uf meh Betonplatz mit vier Basketchörb, rundume zwöi Chuewise, e Ping Pong Tisch und e chlie Spiuplatz. Natürlech hets oh e chline Pool gha. Zum Znacht hets Ravioli a rä Tomate Sauce gä. Das het fascht aune gschmöckt. Nachtruh wäri am 01.00 gsi, dass hei aber nii aui i ghaute. Eis Zimmer het leider nid chöne stiu si darum heisi de haut e chli Nacht-Sport gmacht.

**Samschtig:** Scho früeh am Morge si si dürs Huus gsecklet. Bim Zmorge het mes denä a gse wo nid so lang gschlafe hei. Im Gmeinschaftsrum hei mer gäge Mittag d Ufgab becho us Papier-Karton e Turm ds baschtle. Dä Turm heti dr Turm fo Babel söue darsteuä. Er het müglechscht Stabiu(e ganzi Bible heter müese ha), gross und originell müesse si. Es het stabili Türm gha aber o söti wo ni e mau gstande si. Ds Zmittag hei sogar di heikle Konfirmande gässe, den es het Hamburger mit Pommes Frites und Gmües gä. Am Nachmittag het meh bi verschidinig Workshops chöne mitmache. Zum Bispui e Mini Olympiade, Lämppli baschtle, Meditiere, Konfirmationvorbereitige (dört het sech aber niemer i gschribe), Holzsamme für ds Lagerfür. Zum Znacht hets dür verschidnigi Salät gä. Tonsalat, Härdöpfelsalat und Maissalat. Denn am spätere Abe hei mer no e Talentwetbewerb gmacht. Es isch underanderem dr Borat cho, d Rihanna mit em Lied Umbrella, d Liebeserklärig vo Adam und Eva im mä luschtige Pantomime Theater und no Artiste wo schongliert hei. Nachdem d Sieger verkündet worde si, si mer a ds Lagerfür ga Schlangebrot brättele und hei no dr letschti Abe ds Bevaix gnosse.

**Sunntig:** Am Sunntig morge nachem Zmorge hei aui müesse packe und ds Zimmer bliz blank putze. Zum Zmittag hets aus vorspiis Selerisalat gä, den zur Houptspiess Brate mit Ris. Es pari hei no es chlises wet ässe gmacht mit em Brate. Am spätere Namitag si mer aui mit em Gepäck abe a Bahnhof glofe. Am 16.20 si mer aui den erschöpft und ermüedet ds Ins a cho. **Merci fiu fiu mau für das super super Lager a aui wo mit ghoufä hei oder wo mit cho si!!**